



YMA AW



Chapchar Kut Ropui taka hman a ni dawn

Branch News

Chanmari West February 27 : Mizo ten'a Kut chi thum kan neih zinga ropui leh ngaihhlut ber 'Chapchar Kut' chu Ni 4.2.2011 (Zirtawpni) Dar 10:30 A.m hian Aizawl Sipai Lammual-ah ropui taka hman a ni dawn.

He huanah hian Mizoram Chief Minister Pu Lal Thanhawla chu Kut Pa a ni ang a, Art & Culture Minister leh he kut-a Organising Committee Chairman Pu PC.Zoramsangliana chu Kut Thlengtu a ni ang. Miss Beth A. Payne (US Consul General, Kolkata) chu Khual Zahawm atan hman a ni dawn.

He huna tel tur lam entir tur hian CYMA chuan Khawpui chhung YMA Branch tin te tlawmngaih chhuaha heng a hnuai hnamlam te hi entir turin a ngen a ni.

1. Cheraw (Kantluang)
2. Khuallam
3. Chai - Lalvunga Zai

Chapchar Kut 2011 hi ruahman lawk ang chuan Ramhlun Sport Complex a hman tur a tih a ni a, lammual chei peihfel thawkhat a nih tak avangin a hmun hi sawn leh a ni. He kut ropui tak hawn nan hian Durtlang Branch YMA Zaipawl chuan 'Kan Ram Krista Kan Pe' tih hla an rawn sa ang a, hunserh hi Rev.C.Lalsangliana, Chairman, MKHC chuan a hmang dawn a ni. Tin, CYMA huaihawtin Cheraw kanpui leh khuallam neih tur a ni a, he hunah hian YMA Branch tel zawng zawng te'n cheraw leh khuallam hi an show dawn a ni. CYMA leh Art & Culture Deptt. huaihawtin Chai leh Chhawngnawh

hun hman a ni ang. Mizo zaithiam kan neih lar hrang hrang te he hunah hian an zai dawn bawk a, Mizo hnamzia lan theihna chi hrang hrang en tur a chhawpchuah a nih dawn bakah hnamlam chi hrang hrang entir a ni bawk dawn a ni. Heng bakah hian Beat Group lar tak tak ten hun an hmang bawk ang.

Kan veng Chanmari West pawhin he hunah hian 'Rallulam' entirna hun neih a ni dawn a, he lam hi YMA member te mai bakah naupang engemaw zat in Indoor Stadium-ah ngawrh takin an zir mek a ni.

Chapchar Kut hmanna turah hian Mual sir remchangah Mizo La deh leh Pawnpui tah entir a ni ang a, Kut hmangtu zawng zawng Mizo thawmhna a inchei tur a ni a, Hmeichhia te kekawr ha lo tur leh chhung tin te Kut Sa ei theuh tur leh a nei lote pawhin Kut Artui tal ei theuh turin Chapchar Kut Organising Committee chuan a ngen a ni.

Ni 4.3.2011 a Chapchar Kut A.R Lammuala hman turah kan Branch YMA in item kan neih Rallu Lam, cheraw leh khuallam chu Indoor Stadium-ah zir mek a ni a, tunkar lo awm turah pawh zir zel tum a ni.

YMA Aw leh YMA Chanchinbu la turte Ni 6.3.2011 ral hma a lo zawng turin Section te ngen an ni.

YMA Zawlbuk sakna tur RD Deptt atangin ` 1,40,000/-hmuh chu lak chhuah tawh a ni.

Kumin 2011 chhunga YMA Buk luahtu atan Pu Lalngaihawma te chhung, T-Section chu thlan fel an ni.

LUSUN/KHAWHAR

Pu K.Vanlalhruaia Taitesena Section chuan Ni 21/2/11 Dar 11:45 khan min boralsan. Lusun chhungte CWBYMA chuan a tuarpuiin a kalsan tak a chhungte Pathian awmpuina chang zel turin duhsakna a hlan.

KEIMAHNI

Tunkar lo awm tur Zirtawp Zan atang hian YMA BUK-ah YMA AW hi buatsaih a ni tawh dawn a, thu chhuah tur leh Report pe tur te Editor hnenah emaw YMA buk-a Letter Box ah dah thin tur a ni e.



TUN KAR CHANGVAWN

Mi tinin mahni thiltih fiah theuh zawk rawh se, chu mi hunah chuan mi dang chung ni lovin, mahni chung chauhvah chhuan tur a nei ang.

Galatia 6:4

YMA KUMPUNAN THUPUI 'KHAWTLANG NUN SIAMTHAT' 2011 KAIHHRUAINA

YMA General Conference vawi 65-na chuan, kum 2011 chhunga Kumpulan atan 'Khawtlang Nun Siamthat' a lo thlang leh ta a. Nikum lamah he thupui tho hi Kumpulan atan hmangin, khawtlang nun siamthat beihpui kan lo thlak tawh a, kan hlawhtling thawkhat hle a, hmabak thawh laklawh kan neihte thawk chhunzawm turin, kumpulan thupui ngai kan lo thlang leh ta a. Kuminah hian hlawk zawka kan thawh theih beiseiin, kaihhruaina awmsa ennawn a, siamrem hret a ni. Khawtlang nun siamtha turin do ngai leh inzirtir ngai a awm thin. Do ngai dik taka kan do a, inzirtir tur dik taka kan inzir bawk chuan, kan khawtlang nun hi kan siamtha thei tih ring ngam ila. Kan siamthat tum hi khawtlang nun a nih avangin, vawi leh khata tha duak duak thei a ni lo a, a rah chhuak a muangchang deuh a nih pawhin, dawhthei takin kan thawk fat fat ang a, kan la hlawhtling ngei ang.

THEN KHATNA - DO NGAITE

1. Ruihhlo : Ruihhlo hi mimal, chhungkua leh khawtlang nun tikhawlotu, ti raltitu leh thihna thlen tu a ni a. Ruihhlo avanga chhungkaw keh chhia leh boral ta (phek 3-na ah chhunzawm a ni)

Editorial Board**Editor**

RK.Rozidinga
9436142304

Joint Editor :

RK. Malsawmkima
9862578441

News Editor

Tv. Thangkhuma
9862303135

Pu Vanlalhluta
9862366308

Tv. Vanlalfawna
9856301975

Cir.Manager

Johny Lalthanpuia
9612359161

Jacob Lalrinsanga
9612319779

Production

Manager
R.Lalmachhuana
9436151817

Branch Office Bearer**President**

T.Ngurkhuma
9436190843

Vice President

R.Lalmachhuana
9436151817

Secretary

RL.Thanhnuna
9436152760

Asst. Secretary

K.Darthanthuanga
9436196071

Treasurer

C.Lalzarliana
9436142049

Fin.Secretary

Lalthuamluaia
9612216649

Advisers

Pi Zamanthangi
Pu Vanlalsawma
Pu Rothuama
Pu Lalbiakthanga
Khiangte

Lawmthu

Nl.Ramengzami leh
Pu C.Rualkhuma
te'n article
bengvarthlak tak
min chhawpchuah
sak a kan lawm hle.

Editorial : Chanmari West Branch YMA hi kan lian ve thawkhat viau a, Aizawl khawpui chhung ah pawh Branch lian kan inti a, amaherawhchu kawng tam takah hmasawwna tur kan la nei teuh hian a hriat a ni. Chawlhni tlaiah han leng chhuak ila kan veng khawi maw laiah hian tlangval lo in hawrkhawm tuau tuau hmuh tur hi kan la awm tlat thin. Mimal leh thian zaho thil tih khawm mai ni a lang pawh hian kan Branch hmel a ti lang zel si a, chutihlaiin Branch Hruaitute tan pawh kawng engkima inrawlh mai hi thil theih a ni bik silo. Chumi piah lamah mimal thil a nihna lai te pawh a awm ve tho bawk si avang hian hre reng chung hian kan in hai der mai mai niin alang, amaherawhchu kan pawm zam ta vek tihna erawhchu a ni lem lo.

Rilru puitling silova tam tlurh ringawt mai hian ram ropui min thlen lem lo maithei, kan tam hi kan chhuang a, kan uanpui viau hian veng dang tena min hmuh dan tur hi a duhawm vak lo maithei. Kan vengah hian thalai engmah thawk lem lo awm mai mai zu in nachang erawh hria kan tih ang chi hi kan la tam viau mai a, Rangvamual kawtchhuahah kan awm hi a hriat leh lutuk a, hei hi kan hmel tichhe zo tu ber chu niin a hriat a ni. Kan veng hi a len lam nilovin a mi leh sate rilru hi a puitling em? Khawtlang tan hian engang chiahin nge kan inhuam tih te leh veng aiawha kan fehchhuahna kawngah hian tih tak tak na rilru kan pu em? tih hi in zawh fo a ngai.

Article : USA-AH IVLP KA ZU CHHIM

Lalramengzami

USA (Department of State) sawmnain International Visitor Leadership Programme (IVLP) September 7-24, 2010 chhunga neihah ka kal ve thei hlahu mai a. Hemi programme a kan thupui chu "Changing Demographics and Multiculturalism in the U.S" tih a ni a.

America hian hetiang programme hi kum 1940 daih atang tawh khan a lo kal pui tan tawh a. Kum tin mi 4500 vel khawvel ram hrang hrang atangin zin turin a sawm thin. Hetia a sawm thinna chhan hi America sawrkar hian an ram politics leh culture-in an society a influence dan te hi ramdangmi an rama mipangngai chunglam (leader) te hmuhtir a hriatir a duh vang a ni. He Programmee hmang tura ram hrang hrang atanga kal te hi an mahni ramah hruaitu an lo nih hunah pawh America ram first-hand knowledge an lo neih tawhnate avangin an ram chu America nen inkungkaihna tha tak an neih theih phahna tura an thangkamna te pawh niin a lang. An thil ruahman hi a hlawhtling viau niin a lang a, tuna khawvel ram hrang hranga ramhruaitu Prime Minister, President, Minister etc, ni mek te leh lo ni tawh thin mi 225 chuang lai te hi he Programme lo chhim tawhte an ni.

IVLP programme hmang tur hian ram hrang hrang 14 atangin mi 15 kan kal khawm a. Ka kalpuite hi mifing tak tak leh fel tak tak an ni a, an hriatna a zau hlawm hle bawk. Chutiang zinga ka tela ka zin ve chu engmah ni lo chung pawh kan hawisang ve tep mai.

Kan programme hi Washington DC ah kan tan a. English Language Officer 2, kan zin chung zawng a min hruai kual tur ten min lo hmuak a. Hotel nuam takah kan thlenga. Kan thlen tuk Ni 6 khan Darkar thum chhung Washington khawpui min fan pui a. White House hungna pal ngheng ngei pawhin thla ka zuk la ve ngei e !!

America kan zin chung hian state 4 lai mai min tlawhkual pui a. Washington DC, an sawrkar rorelna hmunpuiah bul min tanpui a, chuta tangin Houston, Texas, Phoenix, Arizona leh New York-ah te kan kal kual. Heng states min tlawh kual pui te hi Immigration, dan leh dan lo a lut te tam na hmun a ni hlawm.

September ni 5, 2010 kha Washington ka thleng a. September Ni 6 hi Labor Day an ti a, an ram sawrkar chawlh ni ve a ni. Hemi ni tak hian

USA a mizo ten Mizo Day wavi 25 na an hman ni tak a lo ni leh zel a. Kei pawh Washington a kan mizo nula chhuanvawr Zoremi'n minrawn hruai a, Maryland lam kan pan, kawng a mawi tawh kan bo hnuah tlai lam programme tlem naging, a pawimawh pawl tak ruaitheh nang hman siin kan zuk thleng thung. He hun hi kan Chief Minister zahawm tak Pu Lal Thanhawla te nupa in an lo hmanpui a, Pu P.L Liandinga pawh a lo tel ve a, ka chibai nghe nghe.

America a kan cham chhung hian mi pawimawh enkawl in min lo enkawl a, kan programme hi Dept of State sponsor a ni a, a hotu ber chu Ms.Janice Brummond a ni a, programme administrator hi Meridian International Center niin, program officer ber chu Ms. Michele Titi a ni . An pahnih hian Breast cancer damchhuak ve ve an ni.

Mi 15 kha pawl hniah min thena, September 12, 2010 khan keini team mi 8 awmna chu Houston, texas lam kan pan a. Kan kal ni vek hian NASA kan tlawh nghal a. Van thengrenga boruak lawng te an thlawh lai a lei lam a lo control na hmunah te kan han kal ve a, a ropui khawp mai.

Arizonona-ah hian Sheriff te kan zuk hmu a, Posse a siam dan te kan ngaithla a. Hmanlai leh tunlai hi dang tawh viau in ngaihtheih mahse, mihring danglamna hi a la nasa vak lo emaw ni chu aw ka ti. Mipa (pangngai !!)chuan pa tak, rorum tak nih hi an lo la duh hle a ni tih kan Sheriff zuk kawm atang hian ka chhar. Kan mizo mipa tam tak min ti hrechhuak tlat...Pa tak a ni ringawt !!!

Khawvel President ho President Obama in UN building-a a address ni, Iran president thusawi ni ni bawkah khan UN building peng pakhtah meeting kan nei ve mial a. President Obama pawh a arcade chu kan hmu pha ve tawh e.

Ka zintheih chhan Pathian, CYMA, CWBYMA leh USA sawrkar chungah lawmthu ka sawi a. Kei hi kum 2009 khan Breast cancer diagnose ka niin, treatment te ka la kha a ni a. Heng hun te hi mumangah pawh ka mang phak lo. Zin chungin chauh deuh chang te han nei mah ila, ka zin kawnga buaina ka tawh miah lo te kha Pathian kaihruaina ka dawn vang a ni.

VANAPA

Report dawn a ni lo.

KHUANGCHERA

YMA member lak zawh tawh a ni a, member 479 leh Life member 23 section chhungah an awm a ni. Member lak laia awm remchang lo te Secretary hnenah a la inpek theih reng e.

Kum 2011 atana member inpe thar zawng zawngte mitthi lumen, khawhar in kal thlanlah leh YMA hmalakna hrang hrangah thahnemngai lehzial turin an in ngen.

Lalrempuia s/o Pu Lalthlamuana (Muantea) Fin.Sect. chuan Bible Society of India-in kum 200 tlin lawmna atana Under 15 Zoram pum huap Drawing Competition a buatsaih ah lawmman Pakhatna a la chu thinlung takin an lawmpui an chhuang hle.

Pu Lalrova Tlau ten tui chhawpna Bottle 4 leh Pu Lalrinawma Hnamte in Bucket 3 section tana an rawn pe chu an lawm hle.

Hun remchang hmasa ah Section Committee neih tum a ni a, hruaitute hunawl lo insiam turin an in ngen.

Section chhunga In luah tur neite Pem Lehkha ngaihpaawimawh thar leh theuh turin an in ngen.

TAITESENA

Ni 24.2.2011 zan khan Pu Lalngaihawma (Sec. Asst Leader) workshop-ah kuang duangin an hnatlang.

Ni 26.2.2011(Inrinni) zing khan section huamchhungah Faina Hnatlang an nei.

Hun remchang hmasa ah committee neih tum a ni a, hruaitute hunawl lo insiam theuh turin an in ngen.

Chhungtinte mahni in leh a vel uluk taka enkawl a bawlhhlawh a paihna tur diktaka paih theuh turin an in ngen nawn leh.

Pu Vanlalhruaia (70) chuan ni 21.2.11 zan khan a boral a, a kalsan tak a chhungte an tuarpui takzet.

Tun dinhmunah YMA member 548 inpe thar tawhin Life Member 46 an awm bawk a ni.

Bial vawng tu te mahni bial a YMA Chanchinbu la tu tur thahnemngai taka zawng leh theuh turin an in ngen nawn leh.

CHAWNGBAWLA

Report dawn a ni lo.

NEUVA

An hruaitu Tv. Ricky Lallawmkima Shillong-a eizawna avanga zin chu dam taka a lo haw leh thuai an beisei.

An hruaitu Pu Malsawma Chhinte Hritlang khawsik in lama in enkawl leh an member Pu Zonunsanga Nazareth Hospital-a awm chu an dam thuai an duhsak.

Hruaitu leh member mithi/ chhiattawk an awmin thlanlah, mithi lumen leh khawhar in a kalna chang hrelo an la awm chu tan la turin an in ngen.

An member exam mekte hlawhtling ngei turin duhsakna an hlan a, chhungtinte thawm bengchheng siamlo turin an inngen.

NGENNA

Chanmari West vengchhunga YMA member inpe zawng zawngte Chapchar Kut atana inbuatsaihna 'Rallulam' zir theuh turin Branch YMA chuan a ngen takzet a ni.

Lawmthu sawina

Ni 17.2.2011 zing dar 4:00 a Aizawl Civil Hospital-a kan fapa Johan Laldinsanga (Thla 5) in min boral san chungchangah a ruang Pu Rochhunga In Neuva Section, Chanmari West-ah chawlhpuia a ni a, Chanmari West Branch YMA, Neuva Section-te'n kuang mawi tak maiin min siamsak a, Br. YMA-in puan in min tuamsak bakah MHIP-te'n pangpar mawi taka min thlah hi kan lawm em em a ni.

In khawngaihna dawngtu
ZAIEMTHANGA te Nupa
Khawpuar

LOCAL COUNCIL NEWS

Red Ribbon Inter-Village Football Tournament neih mek ah vengchhung atanga Donation khawn atangin `43400/- hmuh niin `40293 hmanral tawh a ni a, `3107/- la neih a ni. Tlawmngaia sum petu zawng zawng te chungah Local council leh CWSC chuan lawmthu a sawi takzet a ni.

CVTTP chuan Football tha tak mai an pe a, an chungah lawmthu an sawi tak meuh meuh a ni.

Ni 25.2.11 (Zirtawp) khan Bethlehem 6 - 0 in an hneh a, nimin Inrinni (26.2.11) khan Dinthar nen inkhel lehin result kan hre hman ta lo.

KA MI NGAIH SAN

C. Rualkhuma

Kan veng bik Chanmari West, Aizawl chhung ka han tlir vang vang hian mifel leh tlawmngai tamtak kawng tinrengah chawimawina dawng tlak tak tak an awm ngei ang a, chung zinga pakhat ka hriat kan sawi ve mai teh ang. Lo thik phak an awm a nih pawhin minlo hrethiam sela, chumi dawng tlak a ka ngaiha chuan a thil tih that te sawi kim seng mah ila, a then a zar tlemte chauh kan sawi ve mai mai teh ang.

1. Kum 1988 vel khan kan veng kawngpui kual Pi JR Neih te in luah Pi Dari Petrol zawrh lai a kang chiam mai a. In kang tel ve ngei ngei tur, mi in an thelh ngam tawh loh a ma remhriatna hmangin Balu leh tui nen huaisen takin in thih leh thih tiin a chhanchhuak.

2. Kum 1993 vel khan kan in luah tu naupangin rawngbawina Khawvartui Stove alh lai a pawt thla a, in kang ngei ngei tur, bang vel te pawh alh puat puat tawh, Buara tui chiah in thih ngamin a mah chauhin a thleh mita. Chubakah kan in chungah zan laiah mangan tawpa kan mangan laiin mi hmangaih tak leh huaisen taka thih ngamin min chhan chhuaktu a ni a. Kan in kum sawm chuanga a luah tawh a, a tlawmngaih zia leh a fel zia hi a hrechiantgu pawl tak ka ni ang.

3. Kum 1995 March thla vel khan Pu Lalhriata Colney nu boral zanin thingpui lumna tur Gas Sylinder Pu Sapliana(L) in hnuaiah a kang ta phut mai a, In kang ngei ngei tur, tam takin tih ngaihna an hriat tawh loh leh an thleh ngam tawh loh chu thingzai (Chartin bung) hmangin huaisentaka thelh mit in, a chhanchhuak a ni.

4. Kum 2009 Mach thla vel khan Chawngvawra Picnic Spot-ah kan veng YMA Chawngbawla Section in Picnic an neih tumin, an lawng siam chawp a pil ta mai a, tuia tla hlum ngei ngei tur a ngaih mi 3 (Pathum) a chhan chhuak.

5. YMA Vanapa Section tan a in hmun LSC huamchhung a mi 4mtr a sei a sah thlak.

6. YMA-ah hian kum tamtak atang khan tun thlenga Active tak a hun hmang zel mi a ni.

Chumi ka sawi a hming chu
C. Sangpuia a ni.

ZCC NEWS

Zofa member ah inpek theih reng a ni a, a tui mite in pe theuh turin an in ngen a, Secretary te hnenah inpek theih reng a ni.

Songs and Drama Programme chu Kolasib-ah hlawhtling taka neih zawh a ni a, he hun ah hian ZCC member engemawzat an kal a ni.

Infiamna

Red Ribbon football khelch chhoh dan tur



Mizorama football tournament lian ber chu khelch mek niin, thawhtanni atangin AR Lammuala phul phah tharah an insuan lut dawn a. Zirtawpni thlengin inkhelh vawi 176 awmah goal 806 a lut tawh a, inkhel a piangah goal 4.57 lut ang a ni a. Kan vengin vawi thum an khelch goal 19 thunin, an chhuah lo.

Tun tournament hi Mizoram tana history tling ni turin a tir atangin ruahmanna siam a ni a. Mizo leilenga phul lem phah thar chung inkhelh hmasak ber tur a nih bakah, Mizorama zana khelch hmasak ber tur a ni bawk a. Heng thil pahnihte hi tihhlawhtlin a ni ngei dawn niin a hriat laiin, ruahman ang tak chuan thil a kaltluang ta lo deuh.

A tir takah chuan round of 16 (pre-quarterfinal) atanga final thlengin zan kua eng hnuai khelch tura ruahman a ni a. Mahse, Lammualah March 4 khian Chapchar Kut hman a nih dawn avangin, zan riat chung ruahman leh a ni a. Assam Rifle-in ruahman angin khaw en laiin khelch phal vek mah se, zan thum bak an phal ta lo va. Chu vangin ruahmanna pawh siam that a ni ngun ta hle a ni.

Kan veng tan zana inkhel turin semifinal luh a ngai a. Semifinal hi March 8 leh 9 zan hniah khelch a ni dawn a, March 11-a final khelch hun tur tak erawh thutlukna chiang taka siam a la ni lo va. Sipaiin zan thum an phal chin hman zawh tawh a ni dawn a, mahse, a boruak a zirin zanah final khelch a ni thut mai thei a, hun hman chhoh danin a hriat ang.

Thawhtanni chaw hma dar 11:30-ah phul lem phah hawna hun hman a ni dawn a, chief minister Pu Lal Thanhawla'n a hawng ang. He mi hnu hian round of 16 khelch a ni ngal dawn a, kan veng an tlang a nih chuan team vanneiah an tang dawn a, phul lem phah chung inkhel hmasa ber kan ni thei.

Thawhtan zanah khelch ngal a ni dawn a, veng vannei pahnihte an awm dawn tihna a ni. March 1 leh 2-ah round of 16 khelch thum ve ve awmin zawh a ni ang a. Chapchar Kut hman a nih zawh March 5 leh 6-ah quarterfinal tlai dar 1 leh 3-ah khelch zawh a ni leh dawn a ni.

Zana khel tur hian sum tamtak sen a ni a. Tournament neitu ber Mizoram State Aids Control Society chuan zana inkhelh nan hian `nuai 5 vel a sen belh a. LPS Vision-in hma lain ram danga zana inkhelh nana an hman thin floodlight ang chi metalhalight 60 chah lutin, pakhat hi watt 400 zel a ni a, hei hian halogen watt 2,000 a tluk a. Lammual atan eng tha tawh tura ngai a ni.

Kum kal ta khan team 212-in hming pe lutin Electric Vengin final-ah 2-0 a Dinthar hnehin champion hmasa ber an ni a. `1,00,000, trophy leh sial an la a. Kumin hian champion kutah `1,20,000, trophy bakah se chal hlan a ni dawn a. Sial kaih haw tumin team 216-in hming an pe lut.

Buainain tournament kal mek a tikhahlak nual a. Group C inkhelhna Durtlang field-ah tum thum inkhel zo lova inkhelh tihtawp a ngai a. Joint YMA field, Vaivakawnah minute 90 ral hmian khelch khat tihtawp a ni bawk a. Heng khelch li zinga vawi thum hi an khelch hmabak khelchnawntir an nih laiin, Hnahtial leh Zemabawk North buaina chu nasa lehzuala ngai a ni a, 2-0 a hmahruaitu Hnahtial chu chaka puan ngal niin buaina chawh chhuaktu Zemabawk North chu khel zawm lehtlak lova ngai an ni thung.

Zirtawpni khan Group D inkhelhna Zemabawk field-ah khelch li awm tura ruahman a nih laiin, a hma nia Zemabawk North buaina kal zelah harsatna a awm zui a, tum khat mah inkhel a awm ta lo.

HETAH HIAN SMS LA

>>9774170328<<

YMA member lam zir tur tih a nih laia YMA member pawh la ni lo naupang tam takin lam an zir hi a lawmawm viau laiin YMA membr-a awm te tan chuan a zahthlak viau lo maw. School leh College naupang exam te hi chu an hrethiam awm a, YMA member exam lo kan tam si a, member nih chauh hi em ni kan duh le.

943638__11

Vengchhungah mitthi an awm a, thlan lai a ngai chang hian in chuh buai nuai nuai lovin mumal takin i lai thin ang u. Tlem a zakzum deuh tan chuh ve vak hi a zahthlak thin a nia.

943635__10

(SMS kan dawn te hi Ed. Bd ngaihdan a ni vek kher lo)

Kumpulan Kaihruaina Chhunzawmna

sawi tur an tam ta hle. Chuvangin, khawtlanga ruihhlo zuar leh ruihhlo a awm loh nan mahni huam chung theuhah theih tawp chhuaha hmalak ni se. Khawtlang nun siamthatna hian sual huat leh do a keng tel tlat a ni. Ruihhlo hian zu leh ruihhlo chi hrang hrang ruih nana hman te a huam vek a. Zu in te, ruihhlo tihching te leh ruih avanga buaina siam te kan zilhhau ngam tur a ni. Ruihhlo do kawnga Sorkarin mawhphurhna a pek Sorkar mite leh V.C te, Local Council te a remchan dan apianga thawhpui nise.

2. Mipat hmeichhiatna hman khawloh : Mizo khawtlang nunah mipat hmeichhiatna kawnga mi inthlahdah chu a hmei a pain mi pangngai zinga chhiar an ni ngai lo. Kristian sakhaw inzirtirnaah pawh sex hman dik loh hi sual lian tak a ni. Chuti chung chuan, tunlai hian nupui/pasal kawplai nei chung a ruka midang kawpte, innei si lova sex hmante, kumtling lova pawngsuale, naupang chumchiapsex hmanpui a, an nunna laksak zui tak thawmte hial kan hre ta fo mai. Chuvangin sex hmansual hlauhawmzia leh pawizia hi uluk tak leh thiam taka inzirtir a ngai leh zual ta a ni. Mizote zinga sex zalen ta lutuk tiziaawm turin heti zawng hian tan la ila :

a) Naupang ngaihsak a, thlahthlam lo tura tan la thar turin, nu leh pate uar taka ngen ni se.

b) Tihdam theih loh natna HIV/AIDS hi, vei lo tura ngai zingah pawh vei an tam hle a, sex hman atangin inkawichhawn a ni ber tih hi inzirtir uar sauh sauh ni se.

(Issue leha chhunzawm a ni ang)